

Evening Dogri (NSD)

22-05-2024

खबरां

- 1 लोकसभा चुनाएं दे 6में ते 7में चरण दे मतदान लेई प्रचार जोरें-शोरें नै जारी ऐ।
- 2 केरल च तट रक्षक बलें मच्छी फगड़ने आहली किशतें च सोआर 13 मछुआरें गी बचाया।
- 3 मौसम विभाग नै मध्यम ते उत्तरी उत्तर पच्छमी भारत च तेज लूह चलने आले हालात अगगे बी बने रौहने दी भविक्खवाणी कीती ऐ।
- 4 प्रधानमंत्री मोदी होरें बक्ख-बक्ख स्टार्ट अप संस्थापकें दे सफर दी सराहना कीती।
- 5 आई.पी.एल क्रिकेट च रायल चैलेंजर्स बैंगलोर दा मुकाबला राजस्थान रायल्स कन्नै होग।

<><><><><><>

Campaigning

लोकसभा चुनाएं दे बकाया रौहंदे दऊं मरहलें लेई बक्ख-बक्ख सियासी पार्टिं कमर कस्सी लैती ऐ। मतदाताएं गी अपनी भेठा करने लेई बक्ख-बक्ख सियासी पार्टिं दे बड्डे लीडर रैलियां करा रदे न। उत्तर प्रदेश च बक्ख-बक्ख सियासी पार्टिं दे स्टार प्रचारक 6में ते 7में मरहले दे चुनाएं लेई प्रचार करंगन। प्रधानमंत्री ते भारतीय जनता पार्टी दे वरिष्ठ नेता नरेंद्र मोदी बस्ती ते ते श्रावस्ती क्षेत्र च राजनीतिक रैलिं गी संबोधित करंगन। उत्तर प्रदेश दे मुख्मन्त्री ते भाजपा नेता योगी आदित्यनाथ, जोनपुर, बस्ती, सुल्तानपुर, सिद्धार्थ नगर ते बलरामपुर जिलें च प्रचार करा रदे न, जिल्ले के भाजपा नेता ते मध्य प्रदेश दे मुख्मन्त्री मोहन यादव महाराज गंज, कुशीनगर ते जोनपुर च प्रचार करंगन। बहुजन समाज पार्टी प्रमुख मायावती सुल्तानपुर च प्रचार करंगन जेल्ले के समाजवादी पार्टी प्रमुख अखिलेष यादव होर आजमगढ़ च इक रैली गी संबोधित करंगन। महज त्रै ध्याड़े बाकी न जिसले दिल्ली दे वोटर राश्ट्रीय राजधानी दी हाई प्रोफाइल सीटें गी जित्तने लेई लड़ने आहले मेदवारें दे भागें दा फैसला करंगन। इसी होर रफ्तार देने लेई प्रधानमंत्री नरेंद्र मोदी ते कांग्रेस अध्यक्ष मल्लिकार्जुन खड़गे हुंदा अज्ज दिल्ली च चुनां रैलिं गी संबोधित करने दा कार्यक्रम ऐ।

<><><><><><>

LS 7th Phase

लोकसभा चुनाएं दे 7में गेड़ तैहत 8 राज्यें ते केंद्र शासित प्रदेशें च पैहली जून गी मतदान होग। इस चरण च कुल 904 मेदवार चुनां मैदान च न। चुनां आयोग मुजब पैहली जून गी 57 संसदीय हल्के लेई वोट पाए जाडन। एहदे लेई 2 ज्हार 105 नामांकन भरे गए। 954 मेदवारें दे नामांकन वैद्य पाए गए। पंजाब च इस गेड़ च 13 संसदीय हल्कें च वोट पाए जाने न ते एहदे लेई सब्बनें थवां मते 598 मेदवारें नामांकन भरे। एहदे मगरा उत्तर प्रदेश दी 13 संसदीय सीटें लेई 495 नामांकन भरे गए। लोकसभा चुनाएं दे खीरले गेड़ च उत्तर

प्रदेश ते पंजाब दी 13-13 सीटें, पच्छिम बंगाल द 9 सीटें, बिहार दी 8 सीटें, ओडिशा दी 6 सीटें, हिमाचल प्रदेश दी 4 सीटें, झारखंड दी 3 सीटें ते केंद्र शासित प्रदेश चंडीगढ़ दी इक सीट पर वोट पाए जाने ना। वोटें दी गिनतरी आला कम्म 4 जून गी होगा।

<><><><><><>

PM Modi-Kashmir

प्रधानमंत्री ते बीजेपी दे वरिष्ठ नेता नरेंद्र मोदी होरें आखेआ ऐ जे कश्मीर च बड़ा मता मतदान होआ करदा ऐ ते हुन एहू लोकतंत्र दा इक नमां मानदंड बनदा जा रदा ऐ। इक प्राइवेट खबरें आले चैनल गी दित्ते गेदे इंटरव्यू च श्री मोदी होरें आखेआ जे कश्मीर च होआ रदे मतदान नै 30 शा 40 बरें दा रिकार्ड त्रोज़ी दित्ता ऐ। मैहंगाई बारै बोलदे होई मोदी होरें आखेआ जे दुनिया दे होरनें मुल्लखें दे मुकाबले च भारत च मैहंगाई काबू च ऐ। उनें आखेआ जे रूस ते यूक्रेन बश्कार जारी जंग सिद्धे तौर पर खाने-पीने आलिंग चीजें, ईंधन ते हैलें दिएं कीमतें पर असर पा करदी ऐ। श्री मोदी होरें आखेआ जे होरनें मुल्लखें च करसानें गी यूरिया दी बोरी जित्थे 3 ज्हार रपें दी थ्होआ करदी ऐ, उत्थे गै भारत च करसानें गी एहूदे लेई छडे 300 रपें गै देने पाँदे ना।

<><><><><><>

Amit Shah

पच्छिम बंगाल दे घाटाल च अज्ज इक जनसभा गी संबोधित करदे होई भारतीय जनता पार्टी दे सीनियर नेता ते केंद्री मंत्री अमित शाह होरें आखेआ ऐ जे पाक मकबूजा कश्मीर यानि पी.ओ.जे.के भारत कन्नै ऐ, रौहग ते भारती इसी वापस हासल करोग। उनें आखेआ जे पच्छिम बंगाल च सत्ताधारी त्रिणमूल कांग्रेस, भ्रष्टाचारी ऐ ते बंगाल दे लोकें गी विकास थमां महरूम रक्खा करदा ऐ। संदेशखाली घटना महिलाएं दी इज्जत पर दब्बा ऐ। एहूदे थमां पैहले श्री शाह होरें कांठी लोकसभा हल्के च रैली गी संबोधित कीता। उंदा पुरुलिया ते बानकुरा लोकसभा हल्के च बी दऊं होर जनसभाएं गी संबोधित करने दा कार्जक्रम हा।

<><><><><><>

Shashi Tharoor

कांग्रेस दे सांसद शशि थरूर होरें इल्लै चला रदे लोकसभा चुनाएं च भारतीय जनता पार्टी दे जबरदस्त जित्त हासल करने दे दावे करने गी कोरी कल्पना करार दित्ता ऐ। नमीं दिल्ली च मीडिया दे लोकें गी संबोधित करदे होई उनें आखेआ जे एहू मुमकन नैई ऐ जे भारती जनता पार्टी 2019 आहूले जंदे चुनाएं च आंदे गेदे नतीजें गी दोहराई सकै। उनें दावा बन्नेया जे भारतीय जनता पार्टी दे गढ़ आहूले क्षेत्रें च वोटरें आसेआ वोट पाने दी फीसद घट्ट दिक्खने गी थ्होई ऐ। थरूर होरें इब्बी दावा कीता जे कांग्रेस मेदवारें ते आई.एन.डी.आई गठबंधन नै जोश-जज्वे गी अपनी भेठा बनाई रक्खेआ ऐ।

<><><><><><>

Kerala Coast Guard

केरल च बड़ी तेजिया कन्नै अंजाम दित्ते गेदे इक बचाव अभियान च तट रक्षक बलें मच्छी फगड़ने आहले इक ज्हाज उप्पर सोआर 13 मछुआरें गी बचाई लैता गेआ जेदे च चक्खु दे कंडे थमां 31 समुंद्री मील दूर अपने इंजन डब्बे च समुंद्री पानी दे आई बड़ने दी जानकारी ही। तटरक्षक बल दे ज्हाज ICGS अभिनव नै मच्छी फगड़ने आहली नौका गी बड़ी सरगर्मी कन्नै डुब्बने थमां बचांदे होई नौका ते चालक दल लेई लोड़चदी मदाद मुहैया करोआई। मगरा इस नौका गी मुनाबम मच्छी फगड़ने आहले बंदरगाह पर लेआंदा गेआ।

<><><><><><>

IMD-Heat Wave

भारतीय मौसम विभाग नै इस म्हीने दी 25 तरीक तोड़ी पंजाब, हरियाणा, चंडीगढ़, दिल्ली, उत्तर प्रदेश, राजस्थान ते मध्य प्रदेश च बड़ी मती गर्मी रौहने दी भविक्खवाणी कीती ऐ। मैहकमे दा आखना ऐ जे अगले दऊं दिनें तोड़ी दक्खन पूर्वी अरब सागर दे किश हिस्सें, मालदीव कामोनि इलाके ते बंगाल दी खाड़ी दे दक्खनी हिस्सें दे कन्नोकन्नी अंडमान-निकोवार द्वीप ते अंडमान सागर च दक्खन पच्छमी मानसून लेई साजगार स्थिति बनी दी रौहग। इस करी दक्खनी भारत च शुक्रवारें तोड़ी भारी थमां भारी बरखा बरने दे ते केरल च कल्लै तगर भारी बरखा बरने दे आसार जताए गे न ते अगले दऊं त्रऊं दिनें च तमिलनाडू, पुदुचेरी, करायकल, केरल, माहे ते कर्नाटक च मती भारी बरखा दी संभावना ऐ। मौसम विभाग नै भारत दे मध्य ते उत्तर पच्छमी इलाके च अगले किश दिनें तगर तापमान च 2-3 डिग्री सैल्यिस दा बाद्दा दर्ज होने दी शैंका जताई ऐ।

<><><><><><>

Weatherman

मौसम विभाग नै आखेआ ऐ जे मंदरें दे शैहर जम्मू च तापमान मई म्हीने दे खीरै तोड़ी 44 डिग्री सैल्यिस कोला उप्पर जाई सकदा ऐ। पिछले किश दिनें थवां जम्मू दे तापमान च उप्परोतली बाद्दा होआ रदा ऐ जेडा अज्ज-कल्ल 41 सोयां 42 डिग्री दे कोलकाल चला रदा ऐ। मैहकमे नै अगले कोई इक हफ्ते तगर बरखा बरने दे कोई आसार नेई दस्से न ते मौसम आम तौर पर खुश्क गै बने दा रौहग। मैहकमे नै अगले कोई इक हफ्ते तगर बरखा बरने दे कोई असार नेई दस्से न ते मौसम आम तौरा पर खुश्क रौहने दी तवक्को ऐ। औदे किश दिनें च पारा 44 डिग्री या एहदे शा बी उप्पर जाई सकदा ऐ। मौसम विभाग नै आखेआ ऐ जे औने आले दिनें च बी गर्मी थमां राहत थ्होने दी कोई मती मेद नेई ऐ ते पारा होर बी बधने दे असार ना। विभाग नै इब्बी आखेआ ऐ जे 22 थमां 28 मई मझाटै मौसम आम तौरा पर खुश्क रौहग पर टामीं-आमीं थाहरें पर हौली बरखा बी करी सकदी ऐ।

<><><><><><>

PM-Modi StartUp

प्रधानमंत्री नरेंद्र मोदी होरें बक्ख-बक्ख स्टार्ट अप संस्थापकें दे सफर दी सराहना कीती। इक दे मगरा इक सोशल मीडिया पोस्ट च श्री मोदी होरें स्टार्ट अप संस्थापकें दे वीडियो सांझे कीते ते आखेआ जे कड़ी मेहनत दा रैंक सर्वोपरि ऐ। श्री मोदी होरें स्मार्ट अप्स दे बदने-मठौने लेई मुनासब माहौल मुहैया करोआने दे सरकार दे धेइयै गी उजागर कीता।

VP-Iran Visit

उपराश्ट्रपति जगदीप धनखड होर अजज तेहरान पुज्जे। उत्थें ईरान दे अधिकारिएं उंदा सौआगत कीता। श्री धनखड ईरान दे राश्ट्रपति सैयद इब्राहिम रईसी ते विदेश मंत्री एच. अमीर अब्दुल्लहियन हुंदी मौती पर बसोस प्रगट करने दे आधिकारिक समारोह च शामिल होने लेई उत्थे गे न।

<><><><><><>

WHO Gaza

विश्व सेहत संगठन दे प्रधान ट्रेडर्स अधानोम ग्रेबेयर्स होरें इजराइल गी आखेआ ऐ जे ओहू गाजा च मेडिकल सप्लाई उप्पर नाकाबंदी गी हटाई लै। संगठन नै आखेआ ऐ जे गंभीर तौरा पर तकरीबन 700 लोक बमार न जेडे युद्ध क्षेत्र च फंसे दे न।

<><><><><><>

IPL

आई.पी.एल क्रिकेट च जंदी रातीं गुजरात दे नरेंद्र मोदी स्टेडियम च खेड्डे गेदे पैहले क्वालीफायर मुकाबले च कोलकाता नाइट राइडर्स नै सनराइजर्स हैदराबाद गी 8 विकटें कन्नै हराई दित्ता। एहदे कन्नै कोलकाता नाइट राइडर्स आई.पी.एल दे फाइनल मुकाबले च अपनी थाहर पक्की करने आली पैहली टीम बनी गई ऐ। अज्ज इस्सै मैदान च राजस्थान रायल्स दा मुकाबला रासल्स चैलेंजर्स बैंगलुरू कन्नै होगा। इस मैच दी जेत्तू टीम दा मुकाबला दुए क्वालीफायर मैच च औंदे शुक्रवारें सन राइजर्स हैदराबाद कन्नै होगा।

<><><><><><>